

Uunga siunnersuut: Uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarneq pillugu Inatsisartut inatsisaat**Akissuteqaat**

Aalisarnermut, Piniarnermut Nunalerinermullu Naalakkersuisoq

Pingajussaaneerneqarnera

Naalakkersuisut siunnersuummut matumunnga Inatsisartut Aalisarnermut, Piniarnermut Nunalerinermullu Ataatsimiititaliaata peqqissaarluni suliaqarsimaneranut qujapput.

Siunnersuutip aappassaaneerlugu suliarinerani Naalakkersuisut ilisimatitsipput § 9 pillugu politimesterip tusarniarneqarnermini akissuteqaataanut naapigiaaniarlutik, siunnersuutip aappassaaneerlugu suliarineranut atatillugu allannguutissatut siunnersuummut suliaqareermermi allannguutissatut siunnersuummik saqqummiussaqaqqissallutik. Allannguutissatut siunnersuuteqarnermikkut Naalakkersuisut siunertarivaat, inerteqqutinik aamma naalakkiutinik maleruagassanik aalajangersaasinnaassallutik uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarneq pillugu immikkut pineqaatissiinissamik ingerlatsisinnaanissamut killiliissutitut imaluunniit siaruaanissamut aarlerinarsinnaasunik naapigiaatissatut atuuttussanik. Taamaalilluni maleruagqusani qulakkeerneqassaaq Uumasut Nakorsa qarfiat Inuussutissanullu Oqartussat inatsit malillugu inerteqqutinik aamma naalakkiutinik nalunaaruteqarsinnaanissaat imaluunniit inatsimmut atuuttumik maleruagassatut aalajangiussat malillugit nalunaaruteqarsinnaassallutik.

Aalisarnermut, Piniarnermut Nunalerinermullu Ataatsimiititap isumaliuuteqarnermini inatsissamut siunnersuummut pineqartumut piumasarivaat Inatsisartunut nalunaaruteqartoqassasoq saqqummiussaqaqarnermilu tunuliaqutaqartumik Politimesterip § 9-mut tusarniarneqarnermini akissutaa pillugu. Ataatsimiititap kissaatigisaa naammassiumallugu unioqutitsinermi atuuttussamik inatsimmi atuuttussanngortitsisoqarnissaa pillugu, Naalakkersuisut allannguutissatut siunnersuummut aappassaaneerlugu saqqummiunneqartumut atatillugu allannguutissatut siunnersuummik saqqummiusseqqipput Uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarneq pillugu Inatsisartut inatsisissaatut siunnersuummut allannguutissatut siunnersuummik. Taamatut iliuuseqarneq Politimesterip § 9-ugaluartumut malitsitseriarnissaminut ajornatutut isiginninneranut oqaaseqaataanik tunuliaqutaqartumik aaqqeeriaanertut tunngaveqarpoq.

Taamatut oqaaseqarlunga Naalakkersuisut inassutigivaat allannguutissatut siunnersuummut atatillugu pingajussaaneerneqarnera akuerineqassasoq aammalu siunnersuut tamatuma kingorna taamatut isikkoqartillugu akuerineqassasoq.